

Fobitro Injil Shorif 24 nombor sifara dusra Hannan Forisiti

Alla Pakor hukume siṭir aḳare ou sohifa leksoin, Hozrot Isa al-Mosir sahabi Hozrot Hannan (ra:). Hozrot Isae dunia taki toshrif neoar onuman 50-60 bosor bade ou sohifa leḳa oise. Ikan oilo tan leḳa dusra siṭi. Ita leḳar ḳalo al-Mosir bad-baki hoḳol sahabir mout oigesil, ḳali tain zinda asla, erlagi tan forisoe oigese, 'hou murobbi' name.

I sohifar maze Begom Saebani ḳoia zen gese leksoin, ein ashole kunu manush nae, hou zomanar eḳ zomat. Begomor aolad bolte, zomator shodoishsho. Ar Begomor boin, lekokor elaḳar zomat. Tain mummin bai oḳolor gese minoti ḳorra, eḳe-oinne maea-mohobbot ḳorar lagi. Ar bonḳo moulana oḳolor talim taki hushiar oar lagi ḳoira. Itae ḳoita, Hozrot Isa rokto-mangshor kunu manush nae, tain ḳali ruh, erlagi rokto-mangshor shorile amra zekunu nafak kam ḳortam fari, itae kunu oshubida nae, ḳali ruh oilo dami. I sohifar 7 aeato ase, "Zetae ḳoin, manush surote Hozrot Isa al-Mosi duniat aisoin na, ila mat zegie mate he oilo hou dukabaz ar Ḳane-Dorjal."

Ermaze ase,

- (1) Salam zanani 1:1-3 aeat
- (2) Hoke ar mohobbote solo1:4-11
- (3) Bidaei salam 1:12-13

Salam zanani

¹ Ami hou murobbie ita lekram, Allar fosondor hou Begom Saebani ar tan aolad oqolor gese. Allai hokor katire ami zarare mohobbot kori, kali ami nae, aro zoto manshe Allai hok zanchoin tara hokole zare mohobbot koroin, ou tumrar gese lekram. ² Ou hok to okon amrar bitre boshot kore ar hor-hamesha amrar loge roibo.

³ Hoq ar mohobbotor katire, gaibi baf Alla Pak ar ou bafor kas maear zon Ibnulla, einu Isa al-Mosi, erar torof taki rohomot, meherbani ar shanti amrar loge roibo.

Hoke ar mohobbote solo

⁴ Gaibi bafe zela hukum disoin, hou hukum mafik afnar koezon fua-furin Allai hokor fote soler dekia ami kub kushi oisi. ⁵ O maear Saebani, afnar gese amar ekta onurud ase, amra zanu forteke eke-oinnore mohobbot kori. Ar ou ze onurud ami koriar, ita to noea kunu hukum nae, borong mulo takiu amra ou hukum faislam. ⁶ Allar hukum mafik solau oilo mohobbot. Tumra foela taki ze hukumor kota hunia airae, olaqan mohobbotor fote solo.

⁷ Duniat okon bout laqan dukabaz baroisoin. Zetae koin, manush surrote Hozrot Isa al-Mosi duniat aisoin na, ila mat zera mate era oilo hou dukabaz ar Kane-Dorjal. ⁸ Te tumra hushiar roio, zate tumrar menotor fol na araisia shullo-ana furushkar kamaitae faro.

⁹ Zeta manshe al-Mosir deoa talimor shima faroi zain, tan talimor bitre roin na, tarar dilor bitre Alla nai. Oile ze manush tan talimor ufre tir roe, tar dilor maze gaibi baf ar tan kas maear zon Ibnulla, i duiozonu asoin. ¹⁰ Kunu ustad tumrar

gese aile he zudi ou laḳan talim na dey, te tare salam ḳorio na, ar tumrar baḳit ashroeo dio na.
¹¹ Tare zegie salam ḳorbo, he to ogur bod ḳamor bagi oibo.

Bidaei salam

¹² Tumrar gese to amar aro bout ḳota leḳar asil, oile ḳagoz-ḳolome hoḳolta leḳtam sairam na. Borong amar kial oilo, ami nize aia tumrar loge boia samna-samni gof ḳormu, teu hoḳolor bitoror kushi miḳbo.

¹³ Afnar ze boinre Allae fosond ḳorsoin, tan aolad oḳole afnare salam zanaira. Amin.

Sylheti New Testament (Latin)
Sylheti: Sylheti New Testament (Latin) New
Testament+

copyright © 2014 Ahle Kitab Society

Language: (Sylheti)

Contributor: The Seed Company

All rights reserved.

2020-11-30

PDF generated using Haiola and XeLaTeX on 13 Jul 2024 from source files
dated 29 Jan 2022

2eb27397-6d35-5c13-b811-aecd7920507c